

摘藻堂四庫全書薈要

集部

欽定四庫全書薈要

集部

御選明詩卷四十六

詳校官原任主事臣李斯咏

欽定四庫全書薈要卷一萬八千五百四十六

集部

御選明詩卷四十六

七言古詩十一

張祥鸞

月夜芙蓉

白露塗屋霜華清芙蓉花開池水平池邊亂葉落無數
風吹簌簌微有聲我思美人瑤之圃別時缺月今復盈
良宵對月遙相憶手采芙蓉寄月明

申時行

人日王子幻見過

去年人日歌送君泰山朝旭盤山雲今年人日君相過
雪花欲凍梅花破浮踪聚散不須臾轉眼流光似隙駒
春風幾度頻回首對君且進杯中酒酒邊為我談壯遊
五臺勝絕空神州罡風吹人墮溝壑昂然獨立如孤鶴
獄神呵護信有靈從此人間隱姓名一生好遊輕萬里
歸來且釣吳江水相逢不厭頻相親與君長醉蒲萄春

賦得桂子月中落

古來靈隱標奇勝，鷲嶺龍宮相掩映。
靜夜千峯散綠煙，清秋萬頃開冰鏡。
雲外飄飄若雨珠，廣寒迸出青珊瑚。
淋漓露氣垂金粟，縹緲天香墜玉壺。
初疑仙杵投靈藥，忽似曇花零碧落。
銜實何方集遠雞，洞冥記云有遠飛雞銜柱實來南土
繞枝幾度驚飛鵲。銀闕瓊樓不可攀，
長留膏馥在人間。傳神獨有延清句，
不用淮南賦小山。

洞庭篇壽嚴中翰

崔嵬乎洞庭之山乃在勾吳之墟具區之藪芙蓉點點
七十二雙結青螺綰其口我昔凌滄洲振衣千仞巔西
登縹緲接銀漢東望莫釐生紫煙珠宮貝闕儼相向恍
似負嶠方壺天吾聞靈威丈人入林屋手探蒼水金庭
籙又聞毛公羽化留空壇時有鸞鶴來雲端茲山信美
多靈秘幽棲故是神仙地主人三殿倦揮毫出山便作
還山計只今六十早歸田攝生日誦參同篇洞庭之水
釀春酒醉來恣拍洪厓肩

王錫爵

題成祖四駿圖

錄二首

龍駒

玉勒繡纏髯天廐出真龍報恩苟得所寧論劒戟鋒是
時元戎方首路霜毛血濺仍馳驚將軍抽矢前致詞願
言不忘射鉤時

飛兔

白溝昔合圍龍駕忽三易不成元武陣寧標飛兔跡鬣

懸漬血汗成珠此時七萃紛前驅即今宛馬西來道試
看茫茫白溝草

許國

迴瀾石

平山蜿蜒遙山裏岸轉沙窮翠屏起迴作激潭玉鏡開
一片芙蓉插秋水芙蓉秋水照晴空雲錦參差圖畫中
壁立千尋勢不倚衝波逆障何其雄世間之水總流東
誰當橫潰皆天工君看萬古黃河上片石孤懸砥柱峯

歸有光

題異獸圖

昔年曾讀山海經所稱怪獸多異名仲尼刪書述禹貢
九州無過萬里程搏木青羌何以至伯益所疏疑非真
西旅底貢召公懼作書訓戒尤諄諄周史獨著王會篇
睚眦百怪來殊庭載筆或是誇卓犖傳久孰辨偽與誠
雖然宇宙亦何盡環海之外皆生人陰陽變幻靡不有
異物非異亦非神曾聞漢朝進扶拔唐時方貢來東旌

壹角馬尾出絕壁綠毛忽向人間行近代所聞非孟浪
往往史牒皆有徵今之畫者何所似毋迺誕漫不足憑
考古圖記豈必合任情意造皆成形畫狐似可作九尾
赤首圜題隨丹青嗚呼孰謂解衣盤礴稱良史不識騶
牙與麟趾

皇甫湜

秋日過莊居

千家樓閣俯溪流一道銀河漾綵舟花洲源裏通仙郭

櫺廊山面接平疇。平疇靡迤趨荒陌。虎阜玲瓏望非隔。
松菊歸來陶令居。雲霞宛對王珉宅。嗟予十載滯華臺。
無復求羊問草萊。行披薜荔尋雲入。重褰芙蓉向水來。
回看荏苒浮年度。物華慘澹臨秋素。棲禽半沒漉魚蹊。
落葉全深採樵路。君不見魚腸鑄水只殘流。鶴舞市門
難辨處。念此令人感廢興。何況區區歎遊寓。回棹夷猶
未肯前。傷心寂莫寒煙樹。

皇甫汈

送阮將軍北上

阮侯才氣何翩翩少年志欲圖凌煙屏居一自藍田後
綠沉久卧蒼苔前祇知屈宋工題賦翻笑孫吳用兵誤
種瓜聊傍東陵門射虎忘却南山路君不見老驥雖伏
櫪長懷千里途李陵不歸豈國士魏尚復起誠丈夫我
有美酒傾玉壺飲君願奮千金軀功名會可收桑榆

馮惟訥

送杜明府謝政還遼

仙郎逸氣橫朝野，傲岸不落風塵下。
邠丹六百輒免官，王陽九折能還馬。
羈心浪跡日悠悠，楚水吳山十度遊。
秋風君度紅騾磧，知我題詩白鷺洲。

王世貞

為錢叔寶題懸罄室

錢郎坐我懸罄室，要我為作懸罄篇。
我歌欲就須斗酒，君言室中無一錢。
空梁頗受落月色，北窗僅可涼風眠。
門前黃葉霜如洗，刺促歸來愧妻子。
已少成都學士裘。

祇饒東郭先生履挂壁蠨蛸寒欲墮當門烏雀時空喜
自矜顧愷為前身丹青在手終不貧只愁妙畫通神去
依舊能生釜底塵

經封丘記故尉高適詩有作

我行長夏之封丘紅塵卷汗汗不流東鄰苦酒苦於藥
西舍濁醪濁似油馬頭黃綬令勿跪恐有當時高蜀州
拜迎官長亦細事鞭撻黎庶將何求一官大小各有味
不置齒舌應即休諸君異日但北首看我歸騎凌清秋

領鄖陽命出朝口號

五花小龍團墨敕生新寶鈔鴉翎黑黃封餌合紛後隨
法酒三杯壯行色縱然才劣忝軍鎮稍喜時清偃兵革
節度從他學襄樣征南自古多書癖碧油幢底見故人
喚作羸官羸亦得

贈梁公實謝病歸

汝謀結室羅浮頂下飲仙人葛洪井桂樹宛宛山日深
松花濛濛白雲冷我亦僅買蜻蜓舟歸與少年為薄游

采蓮一曲杳然去得醉即卧清溪頭

夢中得語云百年那得更百年今日還須愛今

日因戲成短歌

化人宮中百事無道書一卷酒一壺枝頭黃鳥聽作曲
西山白雲看作圖朝愛朝暾上東岫夕愛夕陽映西牖
任他故人不通謁任他朝事不挂口偶然案頭餘酒杯
偶然躡屩山僧來自斟自醉當自去禮豈設為我輩哉
昨夜懵騰意超忽寢時得語醒時述百年那得更百年

今日還須愛今日縱能拂衣歸故山農耕社劇亦不閒
何如且會此中趣別有生涯天地間

短歌答張幼于茂才

白龍宛轉逢泥淖漁人色喜路人笑空銜一寸明月珠
眼底無恩可相報張生贈余瑤華篇狂歌隕淚秋風前
何時共鼓滄波去海擊三山吞紫煙

王世懋

人日袁考功見過

今年人日百不娛客游金陵家在吳金陵春事亦不薄
有官何似當年無清溪館前日欲晡誰其過我袁大夫
喜是舊日高陽徒十千斗酒不用沽牀頭春甕足百壺
春陰滿地雲糝糊渡口桃花未著葉門前楊柳難藏烏
金陵少年紫驪駒有酒只過秦羅敷飛光荏苒歲易徂
二毛便欲侵頭顱男兒纔挂馬曹笏河山已限黃公壚
仰天且莫歌嗚嗚尊中酒盡可復呼霜落烏啼更明日
推睂還向府中趨

謝榛

西園春暮

西北風來何太劇，落花滿園春可惜。
黃鸝叫春蝴蝶愁，四野無人日將夕。
惟有一枝留晚春，當砌徘徊不忍摘。
且將尊酒對殘花，春去悲歌復何益。

客居篇呈孔丈

客居寥落天積陰，其奈二毛愁復侵。
東籬有花白衣至，菊花恨不栽成林。
糟牀雨聲夜徹耳，醅甕春色時關心。

昨夢長江變綠酒茫茫不知幾許深倒吞明月蕩豪興
下有蛟龍那敢吟屈原李白莫相笑肯與爾輩俱浮沉
醒者醉者懷不同我狂獨在醒醉中百年形骸匪金石
詎可一日無春風燕臺梁園舊遊處好客邇來惟孔融
太行山頭共俯仰人間誰識真英雄幾醉良宵感秋別
大火自西人自東

梁有譽

湖口夜泊聞鴈

北風夜泊蘆花渚
篷底青燈鴈啼雨
水宿雲翻路幾千
更闌月落知何處
風塵瀕洞誰非客
憐汝南飛霜霰隔
哀鳴却似畏
增繳塌翅何能傳
尺帛嶺樹重重是
故鄉
故園諸弟日相望
寒宵聽汝應欹枕
兩地相思魂夢長

燕京俠客吟

翩翩俠客出燕京
長筵廣宴羅簪纓
豔姬呈趙舞少女
擅秦聲
庭前萬樹鶯花明
眼看世事鴻毛輕
百遍飛觴歌未足
半酣更進伊涼曲
嫣然一轉開心顏
却笑草玄

謾幽獨楊花亂撲鵑鶻裘誰能不飲空自愁醉來拔劍
起自舞天邊斫斷黃河流不肯斂衽事七貴不學低眉
謁五侯向天長嘯振林木俯仰今古皆浮漚萬金築成
走馬埒盡道繁華人共悅昨日車騎游如龍今朝桃李
飛成雪桃李飛飛黃鳥哀酌酒且上燕昭臺憶昔燕昭
下士日高談霸略吞九垓郭隗當師位樂毅抱奇來黃
金銷歇威稜失千載雄圖安在哉又聞鄒衍生挾策事
豪舉矯首聊將玉律吹茫茫寒谷生禾黍莫言造物不

可期人力回旋有如許今人古人不相待行樂莫使朱
顏改志何苦而隱南山憤何深而蹈東海有霞不堪餐
有芝不堪採俠客豪來還自吟長風日暮吹蘭茝

宗臣

送白府之汝南

昨日逢君薊門東千家楊柳春雲碧今日送君薊門西
匹馬翩翩夏雲白白雲一去二千里君亦隨之度汝水
汝水照人明月寒君家心事亦如此聞君昔綰瀟湘符

風流文雅寄蒼梧黃金燕市大如斗遲爾雲霄雙玉鳬
湖上幽棲四章為沈二丈賦

主人結屋楚江曲身被薜蘿坐空谷青天雙眼望鴻鵠
春風一夜開石門萬里薜蘿散新綠

白雲莽莽行山阿北窗疎簾高枕多赤日紅塵將奈何
天風忽送千江雨為爾巖頭洗薜蘿

瑤天露白彩雲沒細掃青松烹紫葢中夜星華濕秋髮
波間古龍忽啾啾人在滄江弄明月

三五幽人踏月華
湖南湖北尋梅花
相逢疑到赤松家
中流一曲寒江笛
吹落崑崙萬片霞

酌洞口

華陽洞前秋如霰
華陽洞裏光走電
聞道寒雲深復深
石壁一竅細如線
吾來大叫石壁開
綠眼仙人夜初見
留之三日不出門
咽盡桃花千萬片

月夜

嚴州城南秋雨繁
嚴州城外波濤喧
兩岸人家住楓橘

千門秋色分蘭蓀楚臣正愛薜荔佩秦人莫愛桃花源
相逢今夜開斗酌千山蒼翠流空樽醉來高卧明月裏
猶有白雲來候門

歸歎

薊門春盡雲陰陰倚杖出門愁暮禽千金裘馬只自好
萬里江湖誰復尋武陵一別桃花源欲歸不歸傷我心
青楓未老楚月白吾將長嘯投吾簪

登江門諸山

山頭日白雲英英千峯倒插千江明手把芙蓉步石磴
蒼翠亂射猿鳥驚誰其雲外吹紫笙欲來不來空復情
天風吹我佩蕭瑟恍疑身在崑崙行

夜歌

萬片浮雲墜江白江上青楓愁楚客天風忽送明月來
我為山中埽蘿石醉把長簫石上吹散盡長空秋一碧

徐中行

過秦郵與袁明府文穀飲甓社湖因憶吾友宗

子相嘗豪飲於此屈指二十年所矣袁是子相
通家子也感而賦贈

宗君一往二十年江左風流尚宛然袁郎崛起亦不晚
遺調曾傳廣陵散恍如楊子逢桓譚安得中郎遇元歎
作客況在黃巖山卧起雲壑非人間訟堂一揮百牘盡
坐聽流水心常閒興來筆底興煙霧華頂霞標照豪素
海嶠曾賡康樂詩天台未數興公賦夢寐惟思燕市盟
白雪一字千金輕但逢吾黨便絕倒三公九錫非其情

頃者甘泉計羣吏冠蓋紛紛向朝市翩翩鳬鳥人不知
獨夜燕闕叩蕭寺入門一揖即稱詩崙崎磊落心竒之
飲罷諸天明月墮復似西江夜詠詩為歡幾日忽分手
艤棹秦郵遲予久娛以千金秦女簫飲我十日平原酒
驪珠忽浮甕社湖酒酣興劇仍狂呼風雷半夜驚濤起
應是當年舊酒徒

吳國倫

閭門別吳叔嘉短歌

吳中少年多好文澹交雅致無如君綠髮遊蹤半五嶽
歸來四壁滄江漬憶從下雉一攜手乞吾片言長在口
我今東泛五湖來十日三醉君家酒酒酣欲別君奈何
閨門獨立成悲歌贈君盧敖之杖王喬鳥片雲吳楚便
相過

飯金雞驛

金雞山頭金雞驛空庭芳草平如席瘴雨蠻雲天杳杳
莫怪金雞不知曉問君遠遊將底為脫粟之飯甘如飴

宿谷里

石門風高千樹愁
白霧猛觸羣峯流
有客驅馳暮未休
山寒五月仍披裘
飢烏拉沓搶驛樓
迎人山鬼聲啾啾
殘月炯炯明吳鉤
竹牀無眠起自謳

過五郎磯

黃龍洲前雪浪飛
浪花疊作五郎磯
小艇縱橫截洄洑
張網捕魚一何速
造次經過不知險
坐愛山衣綠如染
閒情沙鳥俱悠悠
萬古如斯江漢流

送徐行父少參赴關內

咸陽天下險洛邑天下中潼關睥睨周西東君自三川
厯三輔分陝經營王命同登車慷慨千人雄矯若八翼
凌蒼穹左馮翊右扶風漢闕秦畿指顧通為將匣裏雙
龍劍擲作天邊二華峰

張九一

為張生題趙子昂畫菜

誰種嘉蔬繞我堂峭蒨青葱照棟梁須臾絹素發練光

吳興筆力敵穹蒼大者扶疎琅玕樹小者婀娜翡翠羽
便欲采擷媚盤飧山蕨湖蓴焉足數老圃對之長歎息
錯認當年手所植甲坼非關抱甕功華滋盡比束芻色
忽憶籬落栽培汝西風憔悴同荆杞寂莫灌園於陵子
爭似陽春常駐此根葉不隨天運徙雪片如席徒為爾

俞允文

贈性公

性公老禪僧中傑目似青蓮心似鐵天花結髮垂龐眉

香氣隨風生頂穴心持貝葉日千遍手拄猢猻藤百節
庭前栢子菩提青堦下澄溪無惱熱經行處處藏煙霧
生世無心路長絕我來蘭若多年所自笑鳩留困於此
吾師五指能四分僧跋時時還入耳何年更乞甘露偈
一灑清涼潤肌髓

征馬嘶送歸有光

白楊花飛江水黑江頭行人頭盡白青山日出煙塵昏
馬上誰為都門客都門豪客長安兒蒲萄百斛柳千絲

戎裘玉駿邯鄲姬虎旗繡簇紅鴉啼長安三月春未暮
城中不見遊人歸遊人歸醉滿堤青草長征馬嘶

盧枏

留別馮少洲進士

春風吹綠雪湖水生微波與君上河梁攜手哀情多此
時客意難舉觴道傍楊柳鬱金黃欲折一枝留郢客柔
絲冉冉斷君腸斷君腸勞君顧離思渺渺青山暮青山
暮兮傷我心我車南還執子衿贈爾媿無英瓊瑤倚馬

聊為梁父吟

送崔秀才南還

孟冬送客臨沙浦
瀟瀟風動薊門樹
驂騑銜轡不肯行
一鶚南飛過天柱
燕臺擊筑且高歌
青樽酒盡紅顏酡
五更鼓角星野平
看汝騎驄凌天河

七夕

銀闕含秋星欲爛
天孫脉脉度河漢
仙鬟玉珮那可聞
佳人夜半開簾看
階前月色疑有霜
獨坐穿針向畫廊

東方日出烏鵲曉天上人間枉斷腸

襄國飲鴛水野亭奉懷張壚山明府

我盡野亭鴛水陰平沙落日青楓林寒花爛漫不自愛
霜風一墮柴門深我來對此沉吟久況是壚山別離後
何處浮雲晚未還散愁且醉襄城酒

登西城嘉禾樓重送張壚山赴部

高樓西望紫空煙南風渺渺吹河船碧沙細草遠相送
一夜飛過黎陽川驚魂如縷隨君還恨無雙翼凌青天

魏闕霾陰雷隱怒
灞水橫波不可渡
此時揮手重堪悲
千里相逢未有期
燕臺倘值悲歌飲
擊筑先尋高漸離
送友人南還

鳳凰樓外雲氣長
青袍白馬生輝光
送君千里促羽觴
鳴箏清歌如故鄉
相思明日忽分手
誰把青驄繫綠楊
寄謝逸人四溟二首

漢京詞賦多風雅
前擁鄒生後枚馬
四溟旅人興最豪
馮軒落筆長河瀉
醉中一別十經秋
落葉翩翩歎白頭

思君恨無黃鵠羽涕泗遙瞻滄海樓

海水飛動凌三山巨鼇出沒流其間人生風波有如此
颯颯秋風凋玉顏魯連自是紫煙客倜儻長揖二千石
一朝談笑解聊城東入滄溟渺無跡

李先芳

泗溪風雨

扁舟東下泗溪水細雨鳴舷風浪起沙際停橈夜寂寥
孤燭亭亭照行李平明舍舟陟崇岡灘頭水漲川無梁

一林楓樹啼秋葉兩岸蒹葭拂曉霜

對月

碧天如洗月皎皎九陌行人跡如掃遊子天涯正寂寥
堦下草蟲啼不了涼風吹月夜將闌年年相見在長安
笛中欲和關山曲却恐他鄉白雪寒

黎民表

肖甫送至天雄故城因觀宋大觀五禮碑同賦
風吹古城勢欲倒征車北指燕山道道傍穹碑十丈餘

雨剝霜風卧青草我行拂拭開塵沙良工獨苦咸咨嗟
婉麗似出虞秘監廓落正類顏瑯琊金薤離披立蛟鵠
赤手欲掣生龍蛇誰其能此宋令主千載重操黑帝矩
宮中才人捧硯立殿前常侍登牀取白麻宣詔賜天雄
署銜紙尾紛華蟲璫鐫琬琰勒黃絹典雅尚有承平風
可惜龜螭半斑剝牧童燒焚牛礪角銅仙何日去咸陽
花石無踪尋艮嶽停驂啜古不勝悲況是郵亭把手時
關門令尹逢迎處更說羊公曾過之

遇張元春

俠斜日暮紅塵裏揚鞭識是張公子春風大道控驂騮
明月西園醉桃李琅玕玉樹媚容姿步上黃金未足奇
諸生解在東山詠才子邀吟輞口詩長裾嬾作侯門客
挂帆歸訪專諸宅淋漓青壁滿題名牛衣勝卧長安陌
題黃山谷書黃龍禪師開堂疏

鍾陵行草稱第一早歲已入蘭亭室轉運應知腕有神
掣顫尤工老來筆學詩惟許杜少陵翰墨黃州迺其匹

宋人豈解識真龍
天廡驂騑縱奔逸
籍名黨錮疾如仇
白首黔陽作繫囚
平生正得參禪力
萬里危途百不憂
黃龍老宿爾何子
槁目曾識東家丘
相酬妙語千金直
能使芳名萬古流
擘窠何人勒翠琰
野火不肯焚銀鈎
何年搨本來燕市
慘澹無人知滿字
金門久客逢休澣
北牖臨風自粘綴
短髮誰知心尚長
側釐尚望君王賜
魏允中

懷王公子冢伯

北風十月孤舟雪河上逢君酌酒別東風二月花紛紛
把酒看花却憶君君在江南不可見相思遙望洞庭雲

曹大同

元旦酬贈陳海門留讌

勾芒御春陽景熙明庶祥風原野披簇簇卿雲千頃合
霏霏濡露百榮滋黃堂瓊枝直挺秀郎署華精參列宿
陳蕃後裔八閩豪製錦鳴琴來海湊海湊頻年氛祲多
夷舫血戰翻鯨波積陰寒谷思回暖喜見賢侯曳珮過

仁風乍扇化已浹品物昭蘇元祚協履端介祉啟芳辰
燕寢香凝動歡頰雙瞳顧我若平生柏酒殷勤相向傾
已沾玉饌方圓溢復聽華梁歌吹盈坐卷蘭心挹芳馥
文德懸知覃蔀屋共推小范甲兵胸載展士元騏驥足
嗟予濩落卧江濱年年椒頌向誰新甘棠蔽芾徵鄰壤
海上長歌不老春

孫宜

王生入山謝事戲簡

疾風吹雲暗江縣東城之雷北城電城中一雨絕可憐
十日不見王生面昨當折簡傳深意咫尺山城爾須至
揚雄草玄亦避人侯範載酒曾多事

葉春及

王憲副招飲梅菴

北風無雲凍欲裂野人僵卧山中雪使君清興似南樓
尺書招飲梅花月梅花香影落江濱月華如畫酒初醺
夜闌坐覺禪心長孤磬泠泠竹院聞

施漸

贈吳還

山人為客吳門久
白髮蒙茸將被首
興到青山不問家
笑來花肆常沽酒
行路蕭然滿篋詩
風流文采雅堪師
自言身是陶弘景
說與世人誰得知

山中對酒作

昨日不悔今已遲
有酒且倒山中巵
巖下採芳可卒歲
身外求名復幾時
世情悠悠持隴蜀
終局何曾喻難覆

寸長尺短策無如知雄守雌道常谷不須康莊泣路窮
不須凡鳥求梧桐若令貧賤能知足相逢但喚是愚公

送華明伯遊京師

閉門讀書費探討少長未識幽燕道一朝慷慨輕去鄉
萬里雲山祇談笑知君不為干明主俯仰何堪滯閭里
金門試尋大隱處柱下倘逢周內史京城紛紛多貴人
紫貂朱孔玉麒麟彈碁六博白日暮緩轡閒遊御苑春
我昔去京謂旋復一卧草堂困未足文章不合為時用

蹭蹬誰能望推轂君今名齊陸士龍洛下相看爭斂容
有才勿作常何疏早晚名揚將自逢

脩真老人

山中老人鹿豕居不學訓詁身通儒
窖裏茱萸酒常滿門外簣箠竹萬餘
盤桓素履幽人吉清淨每尋開士說
也知大道爾輩能叩君一授長生訣

李奎

西湖舟中

春半出門春可憐黃鸝隔岸啼春煙壚頭沽酒飲不醉
更向西湖喚酒船葡萄荔枝酒色紅銀缸金碗須臾空
但令一醉卧明月莫使醒眼看春風鳳凰山頭春草綠
金牛湖上花成簇日落歌聲水面來畫欄笑倚人如玉
張元凱

東覽篇

出門鮮徒侶看山過東越身披荷芰衣來渡琅玕筏會
稽之郡藏雲中海嶽靈區第幾峯千巖萬壑望不盡一

一秀出青芙蓉溪流漱石噴晴雪山水清音相映發林
間吹落蘭亭風松下飛來鏡湖月石暗花迷失去津禽

魚鳥獸能相親崢泓蕭瑟不可測此中疑有箕山人蒼
旻為棟雲為幕禹穴幽竒可棲託絕壁巔岬嘯夜猿逍
遙夢見騎黃鶴清晨晞髮凌高臺風吹飛花去復來旭
日如珠走滄海赤霞為駕驅天台方丈蓬萊今可至居
然便有凌雲思金宮銀闕何必求一丘一壑隨吾志君
不見東山高卧支許從揮麈玄言若可終又不見芳辰

被禊臨清池茂林脩竹堪忘機謝公勉為蒼生出十年
閒却登山屐右軍自失王藍田歸來擔墓意惘然二賢
信是人中龍霖雨當時仰望同考槃一室已千載至今
林下生清風偶然得失未忘念令人却羨雙冥鴻

寒食限韻作

闔閭風土不禁火綠水城邊碧油舸屢逢蹴踘踏花茵
時見鞦韆亂雲朵金蓮點點步底生鴛鴦彩彩纏頭鞦
越女曾為吳館娃周郎只合留江左前溪桃樹隔垂楊

髻髻紅妝隱青瑣

楓橋與送者別

楓橋秋水綠無涯
楓葉滿樹紅於花
萬里之行纔十里
闔閭城頭尚堪指
遊子尊前淚濕衣
離心已逐片帆飛
酒酣不識身為客
意欲元同送者歸

揚州春眺即事

紫萸村邊揚子灣
黃公壚頭使者關
舟楫遠通淮北水
樓臺近見江南山
高岡百尺臨官渡
浮煙不盡斜陽暮

前朝楊柳幾株存寒鴉飛盡蕪城路

客堂秋夕

高梧百尺入雲涼清水一池生月光
秋夜初長客不寐坐聽砧聲思故鄉
明河展轉天欲曙寒蟬唧唧猶自語
挈衣起寫故鄉書明日關河鴈南去

新豐主人

新豐主人邯鄲婦依然賣酒三河口
芬芳芍藥氣如蘭澉澉葡萄綠於柳
東風日日飛輕塵遊子年年只問津

遲迴立馬門前客曾是壚頭醉卧人

陳第

見楊花

燕山三月飛楊花滿天白雪隨風斜客子出門已十載
飄零感此思回家楊花飛自好客愁不可道歲歲楊花
飛飛盡春光老春光迅速若轉蓬丈夫建樹難為功李
廣不侯馬援謗至今慨歎傷英雄英雄徒拂抑鬚華
忽似楊花色不如匣劍歸去來南山之南北山北

呂時臣

李太常伯華江上草堂雪夜出妓彈琵琶

北風吹雪晝易昏
樹深竹密江上村
紅燈照席不知夜
忽有遠客驚叩門
繫馬登堂不問姓
不顧傍人即坐定
座中舉目皆英豪
主人呼出鄭櫻桃
紅絲裊地氍毹煖
簾額紛香落鳳毛
大小忽雷手中出
須臾翻作鬱輪袍
媚臉斜凝新病眼
一曲低迴黃金槽
衆客聞之各掩淚
潯陽此夜我先醉
天涯海角同此心
古人意氣輕黃金

瞥然上馬出門去酒酣寒極天將曙

鄭若庸

秋涉

蒼山崔巍照秋渚紅樹離離夕陽渡行人涉水更看山
馬足凌兢來復去雲際人家望欲迷松關蘿徑隔煙扉
山僧卧穩西巖寺時有鐘聲落翠微

徐渭

八月十五日映江樓觀潮次黃戶部

魚鱗金甲屯牙帳
翻身却指潮頭上
秋風吹雪下江門
萬里瓊花捲層浪
傳道吳王渡越時
三千强弩射潮低
今朝筵上看傳令
暫放胥濤掣水犀

述夢

伯勞打始開燕子
留不住今夕夢中來
何似當初不飛去
憐羈雄噉惡侶
兩意茫茫墜曉煙
門外烏啼淚如雨
畫鷹

閩南編練光浮膩
傳真誰寫蒼厓鷺
生相由來不附人

綠韞空著將軍臂八月九日原草稀百鳥高高兔走肥
煙中斂翼遠不下節短暗合孫吳機此時一中貴快意
深林燕雀何須避惟將搏擊應涼風誰貪飽鬻矜山雉
昨見少年向南市買鷹欲放平原轡凡才側目飽人餒
不似畫中有神氣夜來鳴梟作精魅安得放此向人世
秋風一試刀稜翅

贈歌者

東風吹雨楊花落清歌細遶鳴鐘閣斗酒將傾客不來

白日斜飛晚雲薄回腰欲舞不得舞試買羅衫倩誰估
十六夜踏燈與璩仲玉王新甫飲於大中橋之

西樓

樹枝畫月千條絃十五不圓十六圓挂向酒樓簷外邊
南市好燈值底錢大中橋上遊人坐不飲空教今夜過
紅脂在口香在樓那能一個到壚頭青衫白馬無聊甚
望斷黃金小鈿鞦

琴高圖為李勲衛賦

天上神仙塞紫虛人間毛穎不勝書乍聞弄玉騎青鳳
又見琴高跨赤魚千年古素粘蝴蝶蒼濤高處擎紅頰
不知儂是畫中人欲請波臣後鱗鬣

雪中騎驢訪某道人於觀追憶曩日棲霞之約
昨日雪深驢沒蹄今日雪晴驢可騎此時去訪楊道士
青天猶壓楊花垂太平門外雖多景莫妙梅花水清冷
棲霞有約不得行孤負千峯老鴉頸

萬里比鄰篇贈嘉則

白藤織笈春花密青袍剪水波紋濕出門寸步即天涯
幃底牽衣絃正急關山斷路不斷雲吳刀割水那得分
章華楊柳弄舊色何地却少春申君人生遠遊須及春
青天能容七尺身芳草長途去萬里望望吾家隨處是
六月七日之夕與梅君客生及諸鄉里趁涼於
長安街醉而稱韻得片字

長安白苧風吹斷銀河瑟瑟難成片楚人慣自唱陽春
一曲未終人已散西內湖荷沒鶴長裁筩不得只聞香

東方萬瓦寒樓閣月照金鵝琥珀黃

楊妃春睡圖

守宮夜落胭脂臂玉堦草色蜻蜓醉花氣隨風出御牆
無人知道楊妃睡皁紗帳底絳羅委一團紅玉沉秋水
畫裏猶能動世人何怪當年走天子欲呼與語不得起
走向屏西打鸚鵡為問華清日影斜夢裏曾飛何處雨

沈明臣

遊張公洞

昨日遊善卷已謂天下無山川今遊張公洞千驚萬怪
疑為夢嗟我壯心欲與山爭雄大肆筆力天無功乃今
欲著一語不可得始知天地之勝唯有茲山鍾我昔探
禹穴又曾躡武夷武夷峻削禹穴古那如此洞幽而奇
張道陵奈爾何何年到此騎青驪我今呼爾問踪跡爾
去人間爾誰識丹壚無火石牀寒唯有空山萬拳石萬
拳之石何累累幻形變態將胡為造物無以顯靈異故
此劇戲令人疑山靈欲悶悶不得天公為之驅霹靂一

斧劈破神鬼愁遂令萬古青霞圻巨闕前開後通竇暗
中一線青天漏離奇鬼怪萬狀陳寶藏龍宮與天闕兩
崖歆仄愁攀援側身却走脚在肩谿訝崢嶸亂撐拄把
炬自照行難前石色黝然堆古漆膩滑十步九步失乍
驚隕落千仞坑又詫飛騰九天窟燎滅燈昏只尺迷萬
轉千盤無路出丹砂夜照鬼燈紅自有乾坤無白日劃
然一隙通天明羅列萬戶排層城頓足大叫舌不縮是
誰槌碎瓊樓傾長廊飛來駕巨壑修簷掀突歆朱楹橫

撐直豎互糾結纏綿雜沓皆相成玉柱隨地不到尺瑤
棟插天懸半壁寂若閒門閉落花開如綺戶迎仙客險
逼重關鎮華夷嚴同帥府森戈戟石乳綠結千年苔又
如五色蓮花開佛手擎雲不可摘玉芽迸筍何人栽蜂
房簇擁參差向短者五尺長者丈低張白玉雲母屏高
擎素錦芙蓉幃盤盂積水寒玉膏掬之洗眼明秋毫恨
無金丹鍊紫石出門空歎朱顏凋吁嗟乎平生之性嗜
登陟茲遊信足償吾癖一挂萬漏不敢辭聊著狂言作

遊籍只恐五嶽之高徒在青雲中猛然欲去無長風不
如坐石投壺喚玉女把酒一醉酬張公

嘉靖丁巳六月十七夜七里灘口待月

夜宿七里灘頭船起來待月船頭坐月隱山雲黑不開
江搖赤壁石欲隨須臾月來江水白萬頃琉璃堆碧色
垂竿欲釣珊瑚珠客星合照初來客初來客願未果重
來看月何時可秋潭再鼓東歸柁

吳中客

吳花吳草愁春煙茫茫白日迷青天天涯有客不歸去
水流腸斷春江前春江水流不復返明日客歸猶未晚
送謝生斯立遊金陵

昔年曾醉金陵酒尚憶烏啼白門柳美人一別三五春
腸斷東風幾回首送君西遊何時還君家自有謝公山
白雲明月不可問悵望桃花空玉顏

煙浦村

煙浦村頭候風色青晨起立日欲昃沙前煙草綠茫茫

塘上野花紅的的風將作浪山氣昏日未當空海光黑
滿天客愁破不得何當飲酒盡一石

姚咨

送施武陵赴選銓部

壯年讀書富文藻海內才名似君少蹉跎老大尚青袍
未解謀生獨聞道負郭曾無二頃田荒扉日掩生秋草
幸逢聖世急徵賢忍甘蹭蹬終懷寶長河流澌歲華晚
高風落木寒原曉旅行千里勿復憂都門豈乏同心好

君不見馬周五十遇常何一朝顙脫風塵表

牟嘉叙

送馬斗南歸揚州

去年九月黃花秋邂逅與子城南遊高才磊落不易得
竟日尊酒情淹留三年為客風塵裏末路相逢即知己
禹穴探幽興未窮梁園作賦詞堪擬一別嗟余還故丘
聞君亦欲尋歸舟萍蓬踪跡本無定使我感慨增離憂
一片孤帆向何處日落雲橫廣陵樹天姥峰前送月明

姑蘇臺畔聽鴻度江煙慘澹江草青衆賓沽酒雙玉餅
別君惆悵不忍去碧雲回首天冥冥

唐詩

贈張汝濟

楚客重山雞愛此錦羽衣雙目炫生花自謂希世奇野
人寶燕石珍藏至什襲蘊匱待沽諸妄意千金直張君
績學惜未遇紛紛薄俗輕相棄却騁鉛刀試一割那識
干將新淬厲我知靈鳳備九苞瑞世豈徒五采毛我知

璞玉重萬鎰良工琢成貴有德他年識者定是非嗟彼
山雞與燕石

岳岱

贈程自邑

天都山人與我別遙指荆襄鼓蘭櫂訪古直上黃花川
思歸嬾出明月峽吳苑逢君碧草春竹林高卧少情親
平生惟有三杯酒十載重看萬里人

陸九州

荆溪

東風靜卷游絲長
桃花吹落流水香
美人照水芙蓉裳
蘭橈玉腕擊波去
欲來不來空斷腸

王叔承

上巳日吳野人烹蟬及吳化父兄弟宴集

前溪雨足溪水新
夜漲桃花三尺春
三月三日日初麗
浮玉流觴驕醉人
偶過楊柳橋西宅
魚罾蟬斷當門立
船頭活蟹紫堪擊
重欲滿斤闊逾尺
主人藏蟹真得宜

急流之下青籠垂日飼稻子數百穗楓落直過桃花時
蜀椒吳鹽落碁細寶刀香膩春蔥絲雄者白肪白于玉
圓臍剖出黃金脂主人有螬不賣錢但逢嘉客留斟酌
持螯豈慕尚方珍長對杜康呼郭索

仲昭約明歲遊天台雁蕩先以逍遙衣見贈作
張公善權二洞歌酬之

范生有約登翠微天台雁蕩余當歸山中鶴翎隨仙壑
秋風贈我逍遙衣衣作逍遙游歌酬縹緲句江帆昨泛

東西九洞府微茫在煙樹張公騎驢出溟渤青山迸作
神仙宅幽徑杳相迷巔崖嶮如齮七日混沌開千年人
世隔一竅深懸窈窕天萬竒亂闢玲瓏石藥田丹竈苔
花深石林冷卧閒雲白西峰玉女歡相招采芝濯足春
潭碧人生有足何輕棄要與乾坤覓靈異放歌醉踏荆
溪船乘興還遊善卷寺礪飛白霧蛟龍巢柱燒玄火雷
霆字探地窟凌穹蒼徘徊兩洞百骸顛狂秀乳結丹碧
寶玉揚輝光下有千丈嵯峨之絕壑鳴泉百道爭赴兮

忽如漢兵十萬走趙壁上有瞰空倚天之陡巖豁豁而
陰森兮恍如層宮複道秦阿房老蝠為仙石為燕山靈
玉手褰衣裳野人衣袂煙霞結勝遊瑰瑋憑誰泄苔川
小范同我袍白縑裁寄湖州雪幽盟更訂琅玕竹得吳
望越心難足劉郎夢落赤城梁謝生詩映龍湫瀑草鞵
布韉枯木瓢身騎鳳凰吹紫簫武林二月桃花雨月明
夜渡錢塘潮


自錢塘由富春桐江抵七里灘同范仲昭

鳴榔曉發錢塘江波開綠酒浮春缸江風吹帆三百里
青山片片隨船窗山頭挂天根插水兩岸陰森那可已
游郎如坐綵雲來人家盡住瑤屏裏三江煙樹嗟空闊
誰道龍中更奇絕陡巖嵐翠寒撲肌拂手藤花灑香雪
荆扉女兒揚茜裙映柳窺人半明滅山村酒價不用錢
笑減青粳沽竹葉風波相遇皆行邁死生肯付乾坤外
采芝昨上桐君廬占星又宿嚴陵瀨

題陳從訓所藏惠崇溪山春霽圖卷

惠崇一詩僧宋首柴周尾丹青入禪觀別自通玄理能
於尺素間點染千山水昨登金焦興不孤陳郎示我溪
山圖畫家精工多近俗寫意得神形不足此僧妙趣種
種兼不滿三尺吳興縑針頭毫末密相接有如螭螭寄
或言工勝趙大年又云妙超展子虔只須三日坐
其下一花一草生意全乃知陳郎揮灑信有本恥與當
今畫家混我歌長句君莫嗤惠崇惠崇郎所師

御選明詩卷四十六



總校官庶吉士臣侍朝

校對官檢討臣蕭九成

謄錄監生臣劉天倉

欽定四庫全書薈要

集部

御選明詩卷四十七

欽定四庫全書薈要卷一萬八千五百四十七

集部

御選明詩卷四十七

七言古詩十二

黃姬水

賣花篇

日南氣候天下奇四序皆如三月時
豳風漫賦為裘什越俗空傳采葛詩
泉甘土沃山川美長日花開爛於綺
不論秋去有蘭蓀寧獨春來盛桃李
初景瞳矐萬戶開

熒童絡繹賣花來一筐新蕊朝纔摘數種奇葩歲自栽
曲房小閣開妝篋紫貝青蚨走輕屨若箇簾前非墮英
誰家門外無殘葉參珠間玉鬪光輝踏青拾翠弄芳菲
花房賸有瑤臺露滴盡儂家金縷衣

王穉登

觀潮歌

丙辰閏七月初吉孟瀆江邊潮水赤寒波帶雨打空城
高浪如山排巨石山田旱熯不可救山人荷鋤惟種荳

游魚忽入荳花中江裏黿鼉近人吼隔岸不聞雞犬聲
前邨盡說蛟龍鬪白頭田父向人語不見江潮大如許
門前堤上種柳樹潮痕深淺能記取去年堤石未沈沙
今日柳枝齊拂水蒼煙黑霧黯不收吁嗟身世如浮漚
牀頭水鳴得赤鯉檻上雲生飛白鷗卧植人力不可運
眼中倏忽隨波流漁舟葉葉爭舄泝踏浪高歌似平地
北客初聞忽膽驚南人坐對猶兒戲我聞錢塘之潮天
下無素車白馬相喧呼鐵箭如沙射江滸錢王當日真

雄圖書生白首老牖下咫尺不辨越與吳嗚呼咫尺不
辨越與吳酒酣耳熱歌烏烏不能三江即五湖轍中之
鮒胡為乎

還家作

游子江東倦行役還家登堂草盈尺花枝三樹四樹紅
頭髮一絲半絲白囊中猶自有殘錢盡買楊梅飽食眠
門外幸無騎馬客清香細雨佛燈前

碧雲寺月出贈朱十六短歌

燕山一片月夜照白蓮花千里萬里同為客三人五人
齊憶家與君俱是悠悠者意氣相逢不相下平原俠士
能鬪雞邯鄲才人堪換馬明星落木亂紛紛同向山中
卧白雲秋風乍起黃花塞明月初生青草墳齊門彈瑟
相知少漢庭執戟郎官小漸離筑傍流水立干將劍上
青虹繞才子風流多落魄青樓狹邪善諧謔趙玉刻就
瑩簇柱蜀繒裂作鞦韆索禪燈繡佛夜厭厭半醉能歌
阿鵲鹽朱公大笑黃金盡三十青衫一孝廉

王逢年

送盛仲交還秣陵

盛生東出關白下桃花滿相逢南陽田
目寄孤雲遠君歸江國正鳴鳩
草綠空磯燕子愁與爾期登雨花閣
六朝何處楚江流

李維楨

沈啓南畫松贈關中李尚書今歸李司徒歌紀
之

啓南畫松百年矣黛色霜皮煙霧起所贈尚書無姓名
但道其人關中耳關中今者李尚書古人與稽今人居
畫手通神神呵護宛在李公讀書處人間世有前後身
後身往往前身因事皆天定良非偶物由人重名不朽
司徒磊砢任梁棟此物居然丁固夢李下有仙松有公
千秋氣韻同生動

黃鳳翔

西湖遇雨

投鞭辭却垂楊路
簫鼓樓船天將暮
緩棹疎簾傍菱荷
清觴豔曲馴鷗鷺
水底馮夷喜欲迎
津頭宓妃遙相顧
澹蕩初颺少女風
蒼茫忽擁藥巴霧
四野溟騰急雨來
中流欸乃奔濤怒
渺渺長湖鷁退飛
紛紛小艇人爭渡
自笑生平樂事稀
懽娛此日亦堪妒
何須秉燭窮夜遊
停橈且向空江住

平望舟中

櫂鼓喧闐催曉發
蒼茫一水分吳越
雲帆搖曳競呼風

綺幕高攀猶見月江干漁父正高眠垂柳如絲繫釣船
昨夜得魚兼換酒舉杯一醉問青天錦衣鼎食非吾事
明月清風若箇邊

涪江秋泛

秋江雨過氣蕭爽買棹夷猶成獨往鷗鷺高眠芳草洲
鰕鱸紛入漁人網一聲斷鴈涼飈來十里平疇皎月上
瀛海潮生騰碧濤陰崖木落振清響亂流駕浪時張帆
避石穿橋力蕩槳浮白懽呼拚醉歸櫂歌互答愜心賞

請君莫羨三島游
老我今為五湖長

王家屏

恭題文皇帝四駿圖 錄二首

赤兔

白溝河大戰胸著一箭
都指揮伊蘇時穆爾拔箭

雷鎬鎬北軍來赤兔走黃雲
開攬身超夾澗策足絕浮埃
白溝原頭振鼙鼓貫陳穿營猛如虎
穆王八駿詎為奇
昭陵六馬應難數
百戰間關未解鞍
箭瘢還向畫圖看
只今四海昇平日誰識當年締造難

黃馬

靈壁縣大戰後右曲池
著一箭指揮奇爾拔箭

軒后興應龍翔駕天駟乘飛黃迴頭看紫燕顧影失超
光君王神武古來少萬里煙塵一劍掃馬蹄蹴處山為
摧何論陳暉與平保揚鞭渡淮淮水清金陵父老壺漿
迎從此華陽休駿足山河重整泰階平

沈一貫

寄贈俞士行淮上治漕

葡萄邸前春雨多典客館下牽六騾將軍抱持貔虎略

且與黿鼉爭水波江河之決雖天事支祈安得稱非祟
欽飛劍出江水渾浪拍芙蓉茜花細西來一線垂青天
天下車輪集似煙朝廷盡食司空力大農歲省鐘官錢
淮陰方知治粟尉高壇何日飛旌旄

送客還山

新荷夜捲梨花雨青山倒浸琵琶渚新裁荷服雅稱身
著入池中不知所牀頭黃石讀已盡尚餘一卷金仙語
施之人間無所用挾向松林避煩暑林中月出遲漁郎

嶺上茶生期姹女鄉音啞啞可憐生賤却清官激梁楚
君房樓立館

荼蘼曉泛東風騫青蘿夜入棠梨軒鷓鴣雞咽咽相喚去
印破西池碧玉痕樓立主人貪晏起片雲忽墮江城午
吾知桃花終不言何用欣欣解人語

于慎行

雪後登樓看山

昨朝飛雪滿大荒登樓四顧天茫茫今朝登樓禁不得

吾與青山頭並白筠牀呼酒晶宇開瑤花積作中天臺
對山遙勸一杯酒平生與君為素友君今頭白青有時
奈何吾鬢終成絲

范謙

壺公山

我聞壺公仙山天下奇俯窺碧波琉璃東西日月兩
明鏡挂在扶桑若木之高枝壺中仙翁握真寶手搏日
月自顛倒杖頭更覺天地寬萬壑千巖恣幽討

顧大典

苕溪春日

苕溪春深春欲歸
柳絲拂地梨花飛
客子辭家已三月
春風初換越羅衣
羅衣競試春江曲
花外鶯聲斷還續
春心羈思兩相催
愁見天涯春草綠
春草年年伴客程
扁舟明日又孤征
故園回首春雲隔
江上春風空復情

劉虞夔

苦熱

燕山虛傳千丈雪昔乃苦寒今苦熱苦寒尚可禦苦熱
安所逃寒有重裘奧室足自庇熱雖袒裼心煩勞炎風
吹埃沸四野火雲布空日如赭長安袞袞車馬塵驅馳
道路何為者吾思仙人乃在閭風岑水晶宮闕琪樹林
安得從之御風吟攬子之袖開我襟念此已足清人心
吁嗟炎蒸三伏無歲無發狂大叫胡為乎

馮時可

燕中感興

秋風蕭瑟吐清商寒蟬收聲獨鳥翔天低野曠莽蒼蒼
黃塵眯目露沾裳之子去兮遠于將載馳載驅道阻長
瞻望弗及聊相羊羈旅無儔中自傷歸來沽酒酌空房
孤燈隱幔暖無光追思夙昔共衾牀歡娛綢繆夜未央
胡為棄我天一方心賞相違淚成行蘭橈桂棹文荔檣
乘飈汎汎水雲鄉君若九春我秋霜安得奮飛集君傍
開筇贈君雙琮璫約如丹青世毋忘

李應徵

長水雨中送董君謨還四明

谿雲壓林林氣黑長河黯澹無顏色大舩驅來笠澤風
一片歸帆雨中濕送君此去歸舊山東湖之水流潺湲
四明崇峰二百八一一峯尖如黛鬢董生瀟灑磊落之
才亦如此對此可以開神顏我歌四明送君酒何惜相
逢整攜手便應喚汝董糟丘酒池之中可拍浮盡埽爾
我坎坷抑塞之窮愁丈夫意氣自有主為龍為蛇何足
數無錢但須典鷗鷖有酒便能賦鸚鵡少年得意多擲

揄却笑乃公爾何苦仰天大叫白日徂腐鼠那敢驚鵩
雛男兒世間何事不可作但不能以此七尺為侏儒功
名富貴可以赤手搏摧眉俛首胡為乎世人聞之皆掩
耳董生之前可語此酒闌歌罷君船發我亦還家渡長
水

姚舜牧

漁樵耕讀 錄二首

漁

孤篷移向蘆洲歇不問瀟湘與溟渤悠然濯足自在流
一聲吹上東山月

樵

腰鎌獨向山中劈擔荷薪枝日將夕青松林下且息肩
坐看一派寒流碧

游朴

崇寧縣却酒

崇寧清酒如鬱金主人長跪留客斟客行欲飲迫程限

不飲傷此主人心春花爛漫遍山壑把酒澆花殊不惡
客還有酒應留連只恐山花已零落

陶允宜

蘄簟

簟出蘄州世所無五月六月繩牀鋪恍坐水閣眠冰壺
皇都炎熱逾江湖貴臣催簟如催租民情誰語州大夫
蘄龜

千年龜小象圍棋其甲翠綠毛毯毳置之盆水生漣漪

蚊蠅遠避塵自離壁頭牀足兒曹嬉不飲不食長如斯
求之艱難誰得之

馮琦

題沈翁畫竹

何人寫此青琅玕滿堂蕭爽生秋寒居然坐我三徑下
數莖不動風珊珊柏溪先生隱於酒戲拈秃筆如揮帚
一幅淋漓竹亦醉醉竹合與先生友矗矗三株狀殊絕
迴若蒼蚪立煙雪別有一枝秀且長青鸞整翮從風翔

葛陂化龍去已久至今屏障生輝光我觀此圖懷耿耿
墨花亂落團團影素節偏宜君子堂虛中獨立尚書省
尚書華省鳳池隅新長孫枝引鳳雛夔龍禮樂方大備
伶倫之管公所須此君安可一日無

送伯楨侍御之川中憲副

間何闊逢諸葛行且止避御史御史今年三十幾廡繡
翩翩帶金紫聖主真憂萬里外使君建節三巴裏刑天
舞干亦自豪精衛填海空復勞黃河懸水三千仞呼風

亂度難容舠嗟嗟王郎汝何往古來得失如反掌長安
大路多摧輪況乃蜀道青冥上蜀道之難難於天不如
歸問桑麻田振衣獨上三峰顛塵埃野馬何茫然君不
見鴈門菟郡伊與鹿南陽畫諾亦見逐世間萬事誰能
卜汝為遠臣恩已足

鄒元標

平原菴僧索詩

平原何代觀音堂羣峰矗矗雲蒼蒼此地故多旅遊者

歸來下馬亦清涼
菴中老僧百不理
偶挈沙彌來聚止
危樓高度貝葉經
憑闌倍覺香風起
足馬青衫憶昔年
斜風細雨寺門前
荏苒韶光數十載
題詩回首倍悽然

馮大受

壽皇甫司勳

酌公金莖九霞之玉醴
獻公霓裳五色之緋袍
贈公長房二龍之竹杖
啖公玄圃千年之靈桃
公能侶天倪守
天弢黃山白岳饒
勝致銀箏翠管環
薛濤一官不笑曼

容拙五言偏稱長城高左錦囊右盧敖酒中聖詩中豪
先生之樂其陶陶今年八十當一籌籌添海屋長滔滔
武林山水

十年夢作西湖遊今日還浮湖上舟湧金門外橫塘路
數里垂楊鎖玉樓樓前流水朝朝綠湖光片片搖寒玉
風中不斷藕花香煙外微聞采菱曲畫船簫鼓載紅妝
楓葉蘆花映夕陽孤山鶴去亭猶在太守堤存柳半黃
岳王祠畔西陵路天矯長松不知數青天晝接兩高雲

紫氣夜通天竺雨靈隱峰頭月漸高羅刹江邊正暮潮
望窮匹練騰滄海坐久天香落錦袍江山萬疊紛繚繞
煙光倏忽迷昏曉默存恍在化人都憑虛何必蓬萊島
便欲移家住此間浮槎載酒日看山不應世諦猶相戀
愁絕題詩醉裏還

龍膺

贈馮定菴大參分藩衡永長句

男兒生不逢辰委山澤濁流皮相苦侵迫汙蠖難容橫

海鱗冥飛甘鍛凌霄翮衆醉人翻嫉屈醒守玄世顧朝
揚白畏景颺馳歲月新塵情波詭乾坤窄褰裳肯類跋
狼胡泣璞從渠猜鼠腊已分干旄避吾門更嗟剡牘削
予跡裹足寧為巖穴逃息心迴與市朝隔芰荷置就束
緋袍竹籜裁將拋墨幘坐擁圖書抵百城友依洞壑投
三益拓落餘生祇自憐摧殘此道憑誰惜何期持節大
馮君生平愛士真成癖翩翩騷雅領蘭臺矯矯神仙下
桐柏兩朝藻潤獨昂藏八極蒼茫恣揮斥其如灾沴咨

游饑宛切痼瘵視由溺星急爰書手抹批雲蒸畚鍤躬
經畫永賴陂渠頌白公于蕃疆土歌申伯每矜苦海作
津梁夙歷羶鄉茹冰蘖四方負笈無乃繁日荅百函亦
何劇高義傾囊急友生虛懷倒屣迎逢掖折簡親揮孔
闓文題封廣置鄭莊驛垂橐惟餘賣賦錢減駟間命登
山屐遂勤物色到煙霞幸奉儀型侍朝夕寸札飛來耀
吉光片辭吐出滋丹液詣許嘗停劉尹車見歆數改幼
輿席不厭詼談樹齒頰最憐慷慨披肝膈柳浪過詢繡

佛廬花邨載款漁仙柵嘯咏風迴萬壑清軒渠日射千
山碧試拂珠巖讀斷碑聊參玉版炊香積穆穆情知霧
隱宜悠悠心與天游適來狎鷗魚暫主盟去愁猿鶴長
離索忽聞新命紫薇堂恰羨仍通羣玉籍探奇好訪愚
公谿乘暇還尋漫郎宅穀推方朔善察眉冠彈貢禹喜
加額拭目文章遍斗南翹首卿雲去天尺開府樓階若
箇登平津閣許何時闢徒懷杜母語不休欲借寇君歎
無筴祖餞惟斟丹井泉壓船擬贈青溪石言將汗漫遊

朱陵公為地主予散客直欲遍擘七十二芙蓉閉因煩
呼巨靈擘月白瀟湘一鴈迴天柱峰頭挾雙鳥

屠隆

閨情

昨日別君楊柳濃今朝悵望櫻桃紅青驄去何在只在
平蕪外春風自煖妾自寒鄰女相過掩淚看日長草綠
嬌黃蝶宛轉啼鵲隔花葉不能飛去喚郎歸何用朝朝
啼向妾

卷四十七
余寅

飛雪洞為程無過太學賦

正月柳條赤二月柳苞拆三月柳絮飛須臾亂如雪殷
雲杲日何續紛綠雨蒼煙乍消歇空憐芳澤長自有寧
信韶光不相守伯勞卷舌哀鴈鳴昨看如雪今如帚如
雪猶且可如帚將奈何暫時豪健誰最別滿目繁華誰
最多一笑把君青玉笋與君大醉柳樹下

楊于庭

題吳翁畫竹

丈人手持一幅竹墨素淋漓筆花秃蕭颯如聞風雨來
琅玕似待鸞鳳宿此翁清節亦不羣直如此竹高出雲
歲寒雨雪但僵卧何可一日無此君

春野耕煙畫

筆花貌得春畦好煙雨冥冥暗層島樹底微茫見茅屋
隔邨野人自驅犢遠勢更著扁舟人疑是桃源來避秦
我亦春煙問津叟不知身在圖畫否

張萱

茱萸灣懷古

茱萸灣頭蘆荻花秋風高日蒸紅霞夜深打鼓負鹽去
潮平軋軋鳴歸艇竹西歌吹杳何許垂楊兩岸黯不語
一聲江笛叫江樓劃斷寒雲不知處

方應選

婁水道中送徐孟孺遊西湖

天空露冷蒹葭白淡月籠沙秋一碧夜深微語破鴻濛

知君賸有煙蘿癖今朝共醉婁水船明朝還著武陵屐
武陵之勝何處尋蒼茫萬頃桃花深南高北高青不斷
湖光山色遙相侵有時扶筇嘯絕頂忽復抱琴雲水陰
乘興往還無不可借此一舒廓落心吁嗟乎香山白社
空塵土西陵紅粉銷煙雨千秋佳事至今傳三竺六橋
竟誰主依稀記得客遊年片片紅霞落塵尾兩湖杳靄
夢見之平分風月今有汝

湯顯祖

夜聽鄧孺孝說山水

終日他鄉作遊子到處不曾離
屋底鄧生爾時何許來
罷酒彈燈說山水君家最近三茅君
我家慣看鑪峰雲
山水眼前人不住遙山遠水復何云

重過石城埭

石城二十四花樓江南置酒飛花愁
在處臙脂久零落
不知冠蓋能風流拾翠江邊猶記否
含笑含嚔送君酒
滿目秋光無盡時自折蓮塘花下藕

送內方山人還天台

滄海冥冥吹遠松青霞片片生殘峰括山一萬六千丈
山人一室蔥翠濃南連委羽紛靈聖金芝翠籥玲瓏映
四明雲日自開窓五縣山川若搖鏡山人原合住山間
每怪山人不住山我夢天台無羽翼空歌積雪送君還
萬州藤障子

劒門藤絲如髮細織作爭先出新意十二雲屏海上来
平波瑩熨瀟湘字纖纖閨指直絕奇闌花側葉鳳交嬉

高吹海色障風日遙憶煙蘿擺月時

袁宏道

和小修

薊州新酒白石缸空雲影澄鴨頭江露梢千縷撲斜窓
黃笙藤枕夢吳艤葛締小眼如雲涼星河放教萬尺長
和東坡聚星堂韻

凍鳥無語僵寒葉曉起漫堦五尺雪穿簾撲幔綴風斜
楮碧紗紅景幽絕鑪膏乍澀紫絨生研冷煤枯霜穎折

千梢擺壓鳳翅垂萬瓦齊鋪魚鱗滅近牆老鵠不知人
却立氄氄如被掣月團三百沸溫瓶盈碗漚花瀉文纈
高禪滿坐矍瑜牀佳言衝口梅檀眉楊岐偈子再三題
龐老機鋒時一瞥東坡先生寫雪真不用煩言與喻說
杜老梅花詩亦然廣平空有心如鐵

瀑布

寒空日夜摩幽綠霧縠龍綃披幾束銀灣截斷牽牛人
鞭起眠龍駕天轂帝宮酒暖澆愁春雲汁茫茫瀉青淥

夜寒霜重玉女驕袖裏金匱向地覆湘娥手挈瀟湘來
雪魄雲魂鬪不足炎官不到落星城六月人間呵凍玉
雲起樓為徹如賦

白雲縹緲如仙客只在軒前人不識高人與雲若故知
近固追隨遠亦得鬢髮人物偶爾成豈有神情與香色
泊然一以氣類從如磁與鐵自相即主人玉女潭邊住
樓居正直高崖處赤闌翠竹與山平便是孤雲來去路
朝隨馬跡渡頭風暮宿菴畫溪上樹雲邪君邪遞為主

茶煙濕處飛泉怒雨中自有徐熙山秋來忽遇王維句
只今長安浩浩塵雲亦隨君馬上去西山逼眼萬螺青
是中應有雲流寓東華舉首即重霄垂天漠漠如飛絮

素中道

麻城道中二首

錄一首

天雨乍霽雲乍拆馬首諸山齊獻碧岑崟突兀何處峰
淡雅鮮妍可憐色長塗遙遙無止息北風夜起轉愁絕
馬鈴當當送殘日烏鴉千點古墳側我有新愁寫不得

山骨鱗鱗忽起脊中間尺餘馬蹄跡只道山石碎馬蹄
誰知馬蹄能穿石莫言此石太辛苦南山石閱北邙土
石深一寸土無數馬上兒郎方笑語

劉黃裳

題小李將軍畫

畫山何得用金碧小李將軍創其跡近來僅數仇十洲
筆法雖工損氣格當年傳說文皇時陰山之旁陳六師
連峯疊嶂出大漠金碧照面光參差馬上大叫龍顏喜

世間山色無如此天開圖畫北海間小李將軍筆法是
乃知將軍之畫有所傳即如此幅何工妍瑋樓翠閣空
中懸綠松片片龍鱗然將軍逝後八百年猶有生氣飛
紫煙堂中風吹山欲動耳邊飛濤鳴濺濺樓中之仙身
似鶴珊瑚鈎卷明珠箔蓬島能移席上開雲霞攬取尊
前落鄭生才高類此峰相邀把酒弄山松披襟若坐翠
山裏海上羣仙爾定逢

王嘉謨

夏日遊張內史園飲酒醉卧既寤日已夕矣偶
題口號

空園花色暗雲卧不知醒松風灑面忽驚起夕陽照見
西山亭遙看羣鳥飛孤嶼無數蟬聲弔殘暑解醒何惜
整新杯散髮行吟自歸去

雜興寄山中人

十丈垂柳枝拂地連城豐草鶯啼亂空山一望少人行
潭水虛舟自艤岸山中伴侶久沈淪奔走風塵媿此身

山人定自長相憶
山鳥何時不向人

沈瓚

春夜篇

春江濫濫東流水
江上徐看月輪起
天末青山隱若屏
搖金疊翠波光裏
波光斜映復斜飛
何處無茲明月輝
既看北里青絲騎
復照南城錦字機
南城北里遙相望
皎月明燈兩相向
寶樹惟懸辟惡香
蘭堂半是流蘇帳
此時誰解怯春寒
此際誰憐春夜闌
王孫笑作金丸擲

少婦疑將玉鏡看呼酒壚頭歡未已洗妝樓上夢應殘
只聞笛裏關山月不識人間行路難深閨別有相思苦
舊歡渺若河山阻一夜煙銷鸚鵡洲三春雲斷鴛鴦浦
悞人碧草徒自芳受露紅蘭為誰吐一生一死人情見
半開半落桃花片不向青陽擬合歡直須黃土追柔豔
的的星河乍欲移沈沈明月夜何其憑將塞上春歸鴈
却寄閨中尺素辭閨中尺素何所有俛首自言別離久
賤妾羞看故苑花狂夫浪折青門柳即看花柳秋復春

那得容顏故復新
錦衾剩有雙飛燕
明鏡惟餘一尺塵
為問春流幾時歇
為問春輝幾時缺
今宵纔是可憐宵
此夜應名可憐月
那堪寂寞可憐人
況復婆娑可憐節
江水東流無盡時
江月年年照離別

自東山放舟西山循巖而行影與帆上下時時
見蒼松古梅點綴林壑波光杳杳無際自辰至
午風稍橫影復參差可愛頗忘其險即事有述

洞庭春水搖煙空
兩山如帶斷復通
吳舫慣剪巨浪出

旭日更照疎林紅林端濛濛山翠巖細蕊喬柯爛生色
榜人歌起青蘆中山家吠犬朱櫻側迴飈送影帆容與
遠岫垂陰近峰仄由來震澤饒波浪復此春遊好風日
主人且停杯聽我尊前歌此時有酒不厭少此時看山
不厭多但得兩山長在眼那愁萬頃來風波春光可惜
渺如許卜居未定成蹉跎

焦竑

雪湖老人墨梅

湘江水落零雨絲羅浮遙遙夢難期華光一逝孤標絕
貌得寒梅第一枝肌膚綽約如冰雪翠袖輕盈弄明月
籬根竹外無人知瘦影橫波共清絕劉生劉生老彌壯
半幅輕綃傳意匠剡溪美人襟抱奇對此悠然得真賞
披圖颯颯生微風春入寒巖雪漸融恍疑身向孤山道
十里林巒香霧中

陶望齡

四月晦日泛若耶至雲門寺

錄五首

兩崖十里蒼筤根中藏一溪雲日髓嫩粉生香笋出林
老枝壓地花成米溪上老翁撐竹船摘米炊枯弄清泚
月下何人見往來惟有山猿同坐起

結葉垂花老榿卧四山無風午剛挫扳花蔭葉橋畔涼
葛屨生衣安穩坐田家初飽麥上場溪雨新過水推磨
林間起步餘睡清青梅滿槃雀卵大

五雲山前盤古樹曾見前朝老謝敷六寺鐘聲何處盡
僧殘惟有粥呼魚筍天已過來麥地瘦一飯山厨鮭菜無

青鞵布韞客何意擔水揭揭來澆蔬

夏首新熱葉氣蒸細路危橋得幽悄
檉樹成林已快人
況有鳴泉覆深篠松髯石髮雅能淨
竹穉鳥雛憐最小
何時一牀卧僧閣飽聽凌晨醒來鳥

雙溪港口泊幽夢石帆山下朝炊動
荒村客到松鼠奔
小市人喧竹排重我生百事松上鉞
雖有寸長何所用
石田千畝雲外閒去采靈芝為君種

陸彥章

得小范吏部南中書漫成

朔風鳴枯白日晏美人遙遙隔羈宦
三時望斷隴頭雲千里書傳霜外鴈
前年總轡帝京春今旦停軒淮水濱
君自東西南北客輸余長作飯牛人

黃輝

送劉學式給諫赴漳州

一尊綠酒付何處東風吹來客將去
不愁客路不逢春何日重來共春住
去住相看且盡杯春遊從此判醒回

眼底酒人風雨散明朝人日為誰來

曉發巴東

霜枕邛雞兼竹雞出戶便踏三層梯沙崩橋折不可度
耐可船行當橋路下坡喚取櫂葉舟捉橈推山山逆流
水急橈疎勢難上覓得枯簷才二丈船無羊耳為誰牽
倉猝繫之槩斗邊岸轉巖傾石相戲仰看山路如簷細
灘頭白勃是平生者回始踏朝雲行那知白日高唐夢
猶帶寒江半里程

吳正志

邯鄲道中杏花盛開馬上偶成

遊子不知春色早驅車漫走邯鄲道陌上看看草色青
郊原忽覩杏花好邯鄲女兒年十五獨立花邊藝蔬圃
鳴箏在手不忍彈似識行人行路苦長安此時春正妍
上林花發豔陽天倚雲耀日織成錦占盡韶華嬌可憐
何似牆東花片片淡妝淺抹生顧盼含露愁看出塞人
香風吹送西飛燕君不見道傍少年金鞍錦勒揚沙走

揮鞭飛矢貫新柳朝逐花間誇得意暮上樓頭醉斗酒
當年不學遊冶兒故園花鳥長相思

送王我虛道人還武當

五月寒江江水長吳雲楚樹遙相望千里青山連去路
一帆明月照霓裳惜君昔訪華陽客斗酒百篇聊自適
狂來輒欲摘星斗醉後翻嫌天地窄陽春本自和人稀
孤蹤常傍白雲飛故鄉靈境久相待一朝跨鶴竟辭歸
與君同是煙霞侶探奇每指棲真處居塵不異出塵心

忘情翻作離情語望君仙裾不可攀坐對名香日閉關
緱山何日吹笙至攜手雲中共往還

康侯叔招飲石亭是先憲副頤山翁別業

石亭山中山繞亭銅峰遠列翠微屏一澗縈迴漾清淺
數行嘉樹當階青秋清氣朗桂花落天香冉冉來虛閣
倦遊偏喜說投簪林下不愁罇寂寞高陽興盡涼景侵
臨流誰復知琴心仰天看日下深壑隔嶺如同鸞鳳吟
阮家何必論南北是處青山皆我屋徘徊願假片石宿

佇看梅花發林麓

李日華

畫扇

春江初汎葡萄綠鷺自翻飛鷗自浴煙消月落早潮平
山影沈沈壓漁屋笑拈此景付詩翁曾向巖灘五番宿

謝肇淛

送練中丞遺裔歸家

有序

自金川門之變練公子寧以御史大夫抗節死闕

下闔門荼毒獨有侍媵抱匝歲子匿民間得免展
轉入閩為人傭保六世孫綺者為新寧陳孝廉掌
書記萬厯戊戌孝廉計偕入浙有江右楊生應祥
同舟先一夕見夢練公持刺謁已心異之比入孝
廉船見書記侍側雅哲不羣指問何姓荅曰練生
心動叩之曰得非吾里練中丞後乎綺不應而涕
淚滿面生益疑駭窮詰之具得其狀亟以百金為
贖孝廉不受遣綺綺不肯行曰以死殉國人臣之

恒且九族赤矣歸將何為生益賢之歸家具白當

事者以幣來聘授以衣巾俾奉公祠官為置田廬
百畝一時聞者莫不歎息泣下以為天道有知云

燕山日黑黃塵起金川門外鼓聲死長樂宮為瓦礫場
殿庭流血成海水御史大夫練子寧手持三尺干雷霆
覆巢自分無完卵一門百口歸冥冥事去人亡二百載
蘆荻蕭蕭餘故壘長陵松柏已十圍孤臣遺骨今安在
釣龍臺下水可楫新寧城東山截葉灌園誰能識法章

傭肆猶堪藏李燮一日天迴地轉時千金購出練家兒
若敖之鬼終不餒行路聞之皆歔歔我登鍾陵山遙望
石頭城寧為孝孺死不作陳瑛生為君慷慨歌一曲悲
風颯颯江波綠

鄧原岳

儀真道中見桃花盛開感而賦之

偏側何偏側行盡江南又江北二月桃花爛漫開燦若
朝霞弄春色今年苦雨花較遲江北不如江南時但願

春風隨轉轂到處花開迎馬足

陳薦夫

題仕卿姪蕉雨亭

仲容入林不種竹
遶芭蕉發春綠
空庭晝靜山雨來
簌簌千聲碎
寒玉清陰翳翳雨
泠泠疎密同
歸葉上聽
樹裏飛泉敲暗綠
林間殘雪破深青
新芭引翠瑩如拭
幾陣黃梅蒼欲滴
微風忽送半窗涼
萬斛珠璣洒空碧
夢回覆鹿不聞喧
有客衝泥扣葦門
相對倚闌吟思足

金
卷四十七
不同深院鎖黃昏

美人買鐵馬

明珠瑩玉垂垂結八角流蘇響淒切風前雙挂玳梁高
自有宮商按成節初聞鳴珮委清都又似飛泉點玉壺
征人曉淚霜天盡怨女秋魂夜月孤東鄰竊聽疑璫玖
琮琤握在良工手少婦帷中溢價酬雙鬟簾下分番守
但道清和比玉揚詎知幽怨結玳瑁重門風雨孤燈暗
悔殺黃金買斷腸

梅村小牧

野水孤村梅萬樹不是尋常放牛處村中小牧非凡兒
騎牛却踏騎驢路村南梅早村北遲牛去牛來隨所之
願得花時長縱牧落梅休向笛中吹左角岐嶷挂西漢
右角彎弓東東觀扣角狂歌梅雨飛白石茫茫滿邨爛
牛背吟成香雪殘邨莊歸路出林端孤寒門向青芬發
莫比尋常牧豎看

王維儉

歲暮贈新安吳用卿

北風吹雲雲四幕歲盡窮陰苦寂寞忽聞有客來大鄣
清姿絕塵立野鶴大鄣山客性耽古開緘發篋光煜爚
夏王九牧鑄黃金大澤深山遠不若于闐鴈肪截昆吾
饗文如髮雙龍攫豐隆燭火天公下紫煙飛盡粉骨薄
錦縹細展墨花翻河東二柳燉煌索會稽內史十五字
崩崖斷石壓秘閣老夫亦出漢螭鈎海虯盤觚綠玉削
方鼎癸父隱亞文滿堂賓客起錯愕篋中寶物朽欲死

誰從柯亭裁新篇
嗚呼此事真未易
共君且傾銀鑿落
曹學佺

題胡可復水閣

驅車來往桃葉渡
渡頭歌管喧盈路
金陵惟此行樂地
可惜為官不得住
我官無事長日間
之子幽期坐此間
橋上行人俱在水
鏡裏嬌娥別有山
幾行楊柳枝交蔭
門外彎環碧流枕
雲散仍從几席生
潮來半是闌干浸
月明艇子搖雙雙
兩岸人家浮玉缸
有時暗泊疎簾下

見爾科頭坐北窓

雨中過柳陳父看杏花陳父時有槁李之游

君家住近瓦官寺金陵城中最僻地向來名作杏花邨
花開始有游人至此時結伴過君家歲歲年年成故事
花枝雖不用錢買濁酒應賒為客醉客醉看花倒接籬
瀟瀟微雨踏成泥枝頭莫惜終零落明日東君渡浙西

陳邦瞻

賦得千山紅樹送姚園客還閩

江南九月霜暗飛秋光春色兩依稀萬樹欲丹疑濕霧
千山如醉帶斜暉畫史含情拂輕縞解作秋妍秋不老
自識晴雲慕錦林莫疑赤燒連衰草此時游客正天涯
此際離情忽憶家聽絕啼鶯嬌映綠愁看飛鷺齊落霞
閨天杳杳接江路酒罷送君從此去想得遙窺荔子丹
尚疑題葉銷魂處

七夕公讌賦得博望槎

梧桐聲脫秋聲起迢迢秋色澹如水天上佳期玉露中

人間良夜金波裏此時漢使向河源此夕乘槎犯斗垣
但驚城舍嚴官府那識天孫遇河鼓雲階月地難久留
飄然枯木復乘流歸來不問成都卜肯信身親見女牛
從此人疑有天路俱言河漢清可度帝子英靈空有人
千秋別淚自沾巾可憐匹練高樓色年年愁殺問津人
袁世振

白鷺巢松

茆齋夜午鳴惡惡雲墮風翻松子落曉看青林已白頭

一片澄湖度山幕縞衣道士愛松聲却架松枝伴月明
何事滄浪閒濯足將雛夜夜松頭宿飢不食泥中稻渴
不飲石上泉延頸佇翼向青天搖紈曳素凌蒼煙君不
見孟浩然幅巾著雪翠微巔又不見陶潛九月九遠樹
深籬人送酒汝墳鳩雀舊有詩海上鷓鴣人未知兒童
慎勿取雛去白盡離人雙鬢絲

范鳳翼

春日酌花下

一春日日同花醉
醉即拋琴伴花睡
花氣朝來沾酒膩
花底常教挂酒瓢
花殘怕似紅顏凋
春愁無酒若為澆
西園有酒花如綺
東鄰不醉花光死
誰分春花逐流水
阮自華

答鄭蓬洲道士

真真石室仙人子
綵鳳花箋三尺紙
千里相聞日月間
十年頻寄風波裏
聞師鑄鼎碧山頭
飛橋走問十滄洲
黃芽白雪照巖岫
好住春光待遠遊

夜泊黃石岐聞笛寄內

無諸城外江流急
夜向澄江發清笛
橫江石貌舊嶙峋
度海風聲況慘慄
月中島樹映江明
笛裏關山並海平
醉向扁舟聽不得
不知夢到幾回情

尹伸

與王忘機飲觀音閣時忘機將訪友楚中

三日不對客
五日不登山
攤書縱過千餘卷
眉穎心靈
了不關
莫嫌敲峭一痕石
百頃澄光嬌軟碧
雨天隴隴

七點峰煙霄翠滴寒樓脊如澁之酒力不經談鋒夏夏
當堅城未知鹿角中宵折已覺鴻毛萬事輕君向雞羣
尋野鶴余亦人中稱寂寞逢君如斯恨其晚出峽恐君
亦思返

王衡

送長孺北征

何以別君無苦顏男兒兩足多波瀾況復春水平登百
千尺呂梁石爛黃河寬今日橋頭設小俎郵筒正報潮

來午天絲飛飛撲酒壺君船且逗黃花浦浦花不可見
船去疾於箭三月蠶子眠青桑思君此際過高唐俄然
大道棗園熟馬頭已飽長安粟長安瓜李玉不如內家
冰氣頗有餘莫道黃沙暗額角早涼會見秋風除秋風
發發送吾子不負當時舊弧矢老大無端怯暑寒千里
之行自此始我唱吳歌軟且輕為君擊筑歌燕聲燕聲
吹入北山去落月亭亭挂楓樹

乞花場詩為徐孟孺陳仲醇作

兩郎租山山背虛野鶴有巢花有廬石芽碑翠鋪庭除
勾連湖水通花渠春來紅白娟娟笑山頭明月來相照
乍可新香釀酒醪剩將狼籍供才調風風雨雨無不宜
高高下下惟所施濕雲滿天土膏滑乞花幸及黃梅時
非但與山添景色兼為古人留勝跡花神自合來周旋
生長不賴花奴力

公鴈

秋夜

河之水清泠泠漾月色明空庭對牛女此夜情願為乾
鵲飛青冥相思宛轉何時平

劉宗周

過張灣

張家渡口灣如織綠水朱門望不極夾岸垂垂楊柳枝
春煙猶帶五侯宅畫船簫鼓日紛紛得意罷官休論貧
回首張灣何處是不堪新說李家村

孫光裕

酌酒與韓求仲

君不見塞上翁失馬不足憂得馬不足喜禍邪福邪迭
相倚世事大都皆若此邯鄲婦嫁厮養兒宿瘤身入齊
宮裏紛紛好醜難具陳好醜由天不在人大夢之中還
說夢浮漚聚散蠖屈伸百年能得幾時樂十九憂愁病
與貧吁嗟乎侏儒飽欲死東方飢欲死才人坎壈自昔
然落落寧惟吾與子且須飲酒醉莫辭人生亦貴適意
耳

御選明詩卷四十七



總校官庶吉士臣侍朝

校對官檢討臣蕭九成

謄錄監生臣周元